

Noor
Mohamad
Shahid
Kamrose



Ada pelbagai cara untuk kita menterjemahkan dan menzahirkan rasa cinta dan sayang seterusnya menyuburkan semangat patriotik terhadap negara ini. Apa yang pasti kita mungkin tidak perlu sampai mengangkat senjata semula kerana bersyukur kita masih bebas merdeka, namun itu bukan alasan untuk kita terlalu leka dan selesa. Ini kerana jangan lupa merdeka sekali belum tentu kita kekal bebas dan merdeka selama-lamanya. Kemerdekaan yang ada ini perlu terus dijaga, dipelihara dan dipertahankan. Dan bagi penulis antara cara untuk terus mencetuskan semangat cinta dan sayangkan negara dengan mengibarkan Jalur Gemilang dengan penuh bangga dan bersemangat.

Kalau ikutkan penulis mahukan semua rumah, kedai dan premis yang ada mengibarkan bendera keramat ini sepanjang masa dan bukannya pada Ogos dan September semata-mata. Hal ini kerana kita menikmati kemerdekaan sepanjang masa dan bukannya pada dua bulan tersebut saja. Tetapi sedihnya rakyat kita bukan saja dilihat tidak sanggup mengibarkan Jalur Gemilang sepanjang masa, malah ramai juga yang masih liat untuk mengibarkannya pada Ogos dan September. Buktinya kita sudah berada di bulan Ogos tetapi sedihnya masih banyak premis dan jabatan yang tidak mengibarkan Jalur Gemilang seolah-olah tiada apa yang istimewa berlaku pada bulan ini. Malah, bilangan kenderaan memasang bendera juga dilihat tidak begitu memberangsangkan. Jadi boleh dikatakan walaupun tema hari kebangsaan cukup signifikan iaitu Negaraku: Sehati Sejiwa, namun melihat keadaan ini mana mungkin kita dapat lahirkan masyarakat yang sehati sejiwa andai masih gagal untuk bersatu hati mengibarkan Jalur Gemilang dengan bangganya.

Kita boleh bersetuju dengan pandangan yang mengatakan tidak mengibarkan bendera tidak bermaksud seseorang itu tidak patriotik mahupun tidak sayangkan negara, tetapi pertama, apa lagi cara yang paling mudah untuk menzahirkan rasa cinta tersebut dan kedua sudah semestinya apalah susah sangat untuk mengeluarkan sedikit perbelanjaan untuk membeli dan



Semangat kibarkan Jalur Gemilang



mengibarkannya. Ringkasnya jangan terus memberikan pelbagai alasan untuk tidak mengibarkan Jalur Gemilang.

Pokok pangkalnya semuanya berbalik kepada sikap dan tingkah laku kita sendiri. Kalau ada cara yang lebih baik untuk menzahirkan rasa sayang kepada negara maka teruskanlah tetapi jika tidak ada idea apa-apa sekurang-kurangnya

kibarkanlah Jalur Gemilang. Baik rumah, kedai mahupun premis kerajaan semuanya boleh melakukannya dengan mudah tanpa perbelanjaan yang besar. Dan inisiatif ini sepatutnya tidak perlu diajar, disuruh mahupun dipaksa kerana semangat cintakan negara itu perlu berputik secara sendiri dan sukarela dalam sanubari setiap seorang daripada kita.

Dalam konteks ini ada

kalanya kita sakit mata juga melihat situasi di beberapa premis terutama premis kerajaan yang kebiasaannya memasang bendera baik Jalur Gemilang mahupun bendera negeri masing-masing di mana keadaan bendera tersebut dilihat terlalu uzur, usang, sudah lusuh, koyak dan berlubang. Pemandangan ini boleh kita lihat masih berlaku di seluruh negara. Kita puji organisasi ini kerana

memasang bendera tetapi tolonglah pastikan ia dijaga dengan baik dan tukar dengan baru apabila sampai masanya. Kadang kala situasi seperti ini berlaku di organisasi yang cukup penting seperti sekolah di mana penulis sendiri pernah menegur sebuah sekolah satu ketika dulu yang membiarkan Jalur Gemilang yang lusuh dan koyak terus terpasang. Bukankah ini akan meninggalkan kesan yang mendalam kepada anak-anak kita yang belajar di sekolah tersebut. Jadi kita harap ketua jabatan memantau perkara ini agar ia tidak mengaibkan imej jabatan tersebut.

Ingatlah inilah satu-satunya negara yang kita ada, kita dilahirkan di sini, kita membesar, berkeluarga dan mencari rezeki di sini malah kemungkinan besar kita akan menghembuskan nafas terakhir juga di bumi bertuah ini. Jadi hargailah negara ini, jaga dan peliharalah kebebasan dan kemerdekaan yang diwariskan kepada kita yang sebenarnya kita pinjam dari anak cucu kita. Jangan kerana kecuaiannya kita pada hari ini bakal menyebabkan

generasi akan datang hanya dapat membaca dalam buku sejarah bahawa negara kita pernah merdeka suatu ketika dahulu. Jadi gunakanlah peluang yang ada ini untuk menzahirkan semangat cinta dan sayangkan negara ini dengan mengibarkan Jalur Gemilang. Buatlah tanpa disuruh mahupun dipaksa.

**Penulis Timbalan Pendaftar
Fakulti Kejuruteraan UPM**